



Broj: 07-40-3-528/20
Maglaj, 31.03.2020. godine

FEDERALNI ŠTAB CIVILNE ZAŠTITE FBiH
n/r gđa Jelka Miličević

FEDERALNA UPRAVA CIVILNE ZAŠTITE
n/r gđin Fahrudin Solak

PREDMET: Inicijativa za izmjenu Naredbe 12-40-6-148-34-1/20 od 27.03.2020.godine, dostavlja se

Poštovani,

Shodno donesenoj Naredbi broj 12-40-6-148-34/20 od 20.03.2020.godine i 12-40-6-148-34-1/20 od 27.03.2020.godine u pogledu ograničenog kretanja za lica mlađa od 18 godina i lica starija od 65 godina, upućujemo inicijativu za fleksibilniji pristup prema ovim populacijama.

Naime, prema važećoj Naredbi ovim licima je naređena apsolutna zabrana kretanja.

Uvažavajuće sve potrebne mjere koje su preduzete u cilju sprečavanja pojave i širenja Corona virusa COVID-19, Općinski štab civilne zaštite Općine Maglaj je na vanrednoj sjednici održanoj 30.03.2020. godine donio zaključak da Štab uputi inicijativu za izmjenu Naredbe iz predmeta.

Naime, period važenja ove Naredbe je pokazao da je ista donijela i određene probleme koji se po našem mišljenju mogu prevazići, a da se pri tome ne ugroze ostale mjere na sprečavanju širenja virusa. Također, napominjemo da analiza starosne dobi do sada zaraženih Corona virusom jasno ukazuje da ne oboljevaju samo lica u poznoj starosnoj dobi.

Zbog toga Štab predlaže da se razmotre mogućnosti i u određenoj mjeri i pod određenim uslovima, prije svega poštujući zabranu javnog okupljanja, socijalnu distancu od najmanje 1,5 m, obavezu nošenja maske i rukavica i sl. izvrši izmjena predmetne Naredbe i ovim licima omogući ograničeno kretanje. Napominjemo da se nismo vodili mjerom koja je donesena u manjem BH entitetu smatrajući da ista nije kvalitetna, jer će omogućiti veću koncentraciju lica preko 65 godina u kraćem periodu na mjestima kao što su trgovine, banke i sl.

Kao argumente naše inicijative navest ćemo nekoliko praktičnih problema s kojima se susreću naši sugrađani, koji se mogu riješiti, a da pri tome se ne utiče na slabljenje mjera sprečavanja širenja virusa.

Primjer 1:

Lica koja se nalaze u kategoriji od 65 godina i stariji, a posjeduju obradive površine odvojeno od mjesta stanovanja (pa čak i par desetina metara) postupajući prema izdatoj Naredbi nisu u mogućnosti obrađivati zemljište i obaviti sjetvu iako sve institucije pozivaju na to, predviđajući težak period ispred nas. Isti slučaj je i sa licima ove kategorije koja posjeduju stoku, živinu, pčele, i sl. a isto se ne nalazi u sklopu objekta u kojem žive.

Nakon okončanja pandemije, sve nas čeka težak period u kome će egzistencija stanovništva biti ključna, te je to prvi i osnovni razlog zbog kojeg smo naveli ovaj primjer.

Primjer 2:

Također, imamo i situaciju da lica sa različitim zdravstvenim tegobama kojima je u ranijem periodu izdata preporuka ljekara o dnevnom izlasku/šetnji/boravku na otvorenom nisu u mogućnosti da to ispoštuju. Naredbom koja je na snazi, provođenje ovakvih vidova medicinskih preporuka za pacijente sa zdravstvenim problemima nije moguće, te se boravkom u kući njihovo zdravstveno, a s tim u vezi i psihičko stanje pogoršava.

Primjer 3:

Mnoga lica iz ove kategorije su vitalne osobe koje mogu obavljati neophodne životne obaveze bez pomoći drugih osoba te time zadovoljiti svoje obaveze poštujući preporučene druge mjere i time ne ugroziti druga lica. Mnoga lica mogu sebi obezbjediti ogrijev za narednu sezonu, obaviti nabavku životnih namirnica i lijekova, podići penziju i sl.

Kao naredni problem sa kojim se susrećemo, ništa manje bitan u odnosu na pomenute, jeste i zabrana kretanja za lica mlađa od 18 godina. Sam boravak u zatvorenom prostoru, negativno utiče na djecu, a sve to dodatno pogoršava i činjenica da su izloženi konstantnom radio i TV izvještavanju o broju zaraženih, umrlih, te općenitoj situaciji koja vlada u našoj zemlji, ali i okruženju.

Do danas od izdavanja i početka primjene ove Naredbe imamo sve češće situacije u kojima se roditelji žale na razdražljivost, neposlušnost i nemirnost djece, a sve to proizilazi iz zatvorenog prostora koji negativno utiče na psihofizičko zdravlje djece.

Smatramo da je od izuzetnog značaja omogućiti izlazak osoba mlađih od 18 godina uz poštivanje važećih mjera o zabrani okupljanja i socijalne distance. I ovdje predlažemo ograničene mjere, kao npr. da djeca do 14 godina mogu se kretati samo uz prisustvo najmanje jednog roditelja ili druge punoljetne osobe. Također navodimo primjer s kojim se susrećemo, a koji je rješiv bez ugrožavanja drugih lica.

Roditelji koji se nalaze u skupini koja nema zabranu kretanja, a imaju maloljetnu djecu u skladu sa važećom Naredbom nemaju mogućnost izlaska vani s djecom, odlaska u prirodu, odlaska na izdvojena imanja kako bi se djeca relaksirala, te radili na vlastitom psihofizičkom razvoju. Tako recimo porodici s djecom je zabranjeno da izađu svi vani i prevezu se autom na neku lokaciju (vikend objekat, otvoreno imanje, šumski predjeli i sl.) na kojoj neće nikog ugroziti, a pri tome je moguće pozitivno djelovanje na zdravlje i raspoloženje djece. Nažalost, zabrana koja je na snazi dovodi do toga da roditelji, vodeći računa o zdravlju djece i potrebi fizičke aktivnosti na čistom zraku, djecu kriju po automobilima i odvoze na lokacije koje nisu stalno pod nadzorom policije, a koja je zadužena za provođenje ovih mjera i time se vrši nedozvoljeno okupljanje.

Izmjena ove Naredbe je od izuzetnog značaja iz razloga što ne znamo koliko će period pandemije trajati, a ni u kom slučaju nije nam u cilju narušavati zdravlje djece, niti bilo koje druge dobne skupine.

Napominjemo da naši prijedlozi nikako ne podrazumjevaju kršenje ostalih naredbi i mjera koje su na snazi i da je stanovništvo dužno poštovati važeće mjere koje se odnose na zabranu okupljanja i socijalne distance, kao i sve druge higijensko-epidemiološke mjere.

S poštovanjem!

Dostavljeno:

1. Federalni štab civilne zaštite,
2. Federalna uprava civilne zaštite,
3. Arhiva.

KOMANDANT OPĆINSKOG ŠTABA CZ

Mirsad Mahmutagić



